



## IV GOVERNUN KONSTITUSIONÁL SEKRETARIA ESTADU KONSELLU MINISTRU

### KOMUNIKADU IMPRENSA

Sorumutu estraordinária Konsellu Ministru iha loron 22 fulan Dezembru tinan 2011

Konsellu Ministru hala'o Sorumutu Estraordinária iha Kinta-feira ne'e, loron 22 fulan Dezembru tinan 2011, iha sala Sorumutu Konsellu Ministru, Palásiu Governu Dili no aprova ona:

#### **1. Medida hirak ne'ebé destinada hodi garante ordem pública no Seguransa Interna País nian**

Haree ba insidente daudaun ne'ebé envolve grupu arte-marsial, iha Dili no distritu sira seluk-hanesan iha Zumalai/Suai-Covalima, Ainaro no Lautém- ne'ebé provoca distúrbiu sériu hanesan estraga sasan, mate no kanek, Konsellu Ministru rona Komandante Distritál Dili, Polisia Nasionál Timor-Leste (PNTL), Pedro Belo, no Komisáriu PNTL, Afonso de Jesus ne'ebé apresenta relatóriu detalla ida kona-ba situasaun seguransa interna País nian.

Maski halo beibeik deklarasaun ba kompromisu sira, husi representante diresaun grupu arte-marsial sira oioin, atu salva guarda respeito ba prinsípiu konvivénsia sosiál, hodi asina ona dokumentu ida ne'ebé husi nível aas nian, iha fulan Maiu tinan 2011, ne'ebé mak grupu sira halo tiha juramentu atu kontribui ba ambiente pás no estabilidade iha País, verifika katak iha nafatin violasaun sistemátika ida ba akordu ida ne'e.

Konsellu Ministru mós analiza efeitu negativu husi *joga bola guling* no lataria, ne'ebé mak afeta bem-estar sosiál no halakon virtude valór morál no étiku foin sa'e no família sira nian, hodi kontribui ba violénsia, mak hanesan violénsia doméstika, no liu-liu ba sosiedade tomak la hetan hakmatek.

Iha sentidu ne'e, ho Natal, Tinan Foun no Eleisaun ba tinan 2012 hakbesik daudaun, IV Governu Konstitusionál konsidera urjente hodi foti medida ne'ebé adekuada hodi garante seguransa no bem-estar ba populasaun.

Nune'e Konsellu Ministru, liu husi análise ida ne'ebé klean kona-ba relatóriu ne'ebé hato'o husi Komando Jerál PNTL nian, rezolve suspende to'o loron 21 fulan Dezembru tinan 2012, autorizasaun ba prátika atividade hotu-hotu grupu arte marsial sira nian ne'ebé hetan prova katak provoca dsitúrbiu, violénsia no

krime, inklui proibisaun treinu no prátika arte-marsiál sira, nune'e mós obrigasaun absoluta atu labele halo mobilizasaun ba ema sira hodi tama iha grupu sira ne'ebé mak pratika arte marsiál sira. Suspensaun ida ne'e sei renova fali iha períodu sira ne'ebé hanesan tinan ida nian kontra grupu hotu-hotu ne'ebé mak viola medida suspensaun ba prátika arte-marsiál sira. Sei aplika " toleránsia zero" ba membru PNTL no F-FDTL sira hotu ne'ebé partisipa iha atividade grupu arte marsiál sira nian, sira sei hetan aplikasaun ba sansaun disiplinár, inklui demisaun instituisaun nian rasik, tuir termu lei orgánika no estatutu disiplinár sira. Konsellu Ministru rezolve ona hodi impede mós jogu *bola guling* no lotaria iha teritóriu Nasionál Timor-Leste hahú husi loron 22 fulan Dezembru tinan 2011.

Iha fatin públiku ka privadu, ne'ebé hala'o prátika atividade ne'ebé halo parte rezolusaun ida ne'e sei taka kedas. Sei revoga fali áktu hotu-hotu ne'ebé hetan lisensa ka autorizasaun prátika atividade ne'ebé halo parte iha deketu-lei ida ne'e.